

十九 劉師培

一

劉師培，原名光漢，字申叔，江蘇儀徵人。少承先業，服膺漢學，經史諸子百家語，無所不通。文章雄麗，步武齊梁，與餘杭章太炎並以古學名世。雖參籌安會之列，而不可掩其學也。

二

儀徵劉氏，三代傳經，俱以左傳春秋，蜚聲道咸同光之間。申叔幼承庭訓，用力尤劬，願書生好大言，負所學以自岸異，不安儒素，而張皇國是，誦說革命，微詞諷諭，一一託之於文字。清末與章太炎，黃季剛，陳去病等，組織「國學保存會」於上海，發行「國粹學報」，借名研究學術，實則鼓吹革命，而申叔所著「攘論

「，及「中國民族誌」，尤爲當時所傳誦。及太炎下獄，恐受株連，乃亡命於日本。

是時兩江總督端方，雅重文士，而於革命黨人，亦喜以溫和手段對付，因慕申叔高名，乃使使致敬慕意。申叔夫人何震，擅交際，悍銳能制其夫，以亡命久，浩然有歸志，遂與端方通款素矣。黨人聞而大憤，指爲滿臣之偵探，申叔因繫眷歸國，竟入兩江之幕矣。

三

太炎聞此甚憤，致書諷勸，不報。既而，端方罷，申叔亦惘惘失意，則去而之川，爲國學院講師。及革命軍興，川人殺端方，並囚申叔亦將殺之，太炎以書爲解，有「若殺劉申叔，則中國讀書種子亦絕矣」語。及獲釋，又爲介紹充北京大學文科教授，介書中有言：「劉生儒林之秀，使之講學而不論政，亦足以駭明國故，牖迪後生，未可以一眚而廢也。」

民國建立，袁世凱爲第一任大總統，既而，帝制自謀，參政楊度以申叔負盛名，因邀爲籌安會發起人。嘗著「君政復古論」，時人比爲楊雄之「劇秦美新」。迨世凱敗殂，而申叔之望，亦隨並墮矣。然以文章古雅，又有「書獃子」名，人亦以此多之，而不加以深究。

四

申叔蹇滯都門，意態蕭瑟，嘗爲揚雄傳後五古一首，亦聊以解嘲耳。詞云：「荀孟不復作，六經秦火餘。篤生揚子雲，卜居近成都。文學窮典墳，頭白窮著書。循循善誘人，門停問字車。法言象論語，太玄開潛虛。反驢弔屈原，作賦比相如。訓纂辨蝌蚪，方言釋蟲魚。雖非明聖道，亦復推通儒。紫陽作綱目，筆伐更口誣。惟據美新賦，遂加莽大夫。吾讀華陽志，雄卒居攝初。身未事王莽，茲文得無誣。雄本志澹泊，何至工獻諛？班固傳信史，徵詞雄則無。大醇而小疵，韓子語豈疏？宋儒作苛論，此意無乃拘。吾讀揚子書，思訪揚子居。斯人今則亡，弔古空躊躇。」

？

申叔年未四十，而著述甚富，儻天假以年，其遺惠於學術界者，或不在太炎之下矣。以民國八年十一月二十日卒，年僅三十有六。生平文章之譽，掩其學術，復以捲入政海，以致憂傷而折。然則中國學人才士，誤於政治者，又豈止申叔一人而已哉？

